



*Komunikadu Imprensa*

*Periodu Juñu 2011*

*Edisaun, 01 Juñu 2011*

## **JSMP kontinua organiza treinamentu ba lideransa komidade feto iha Suco Betano Distrito Manufahi**

Iha loron 02 fulan Juñu 2011, JSMP liu husi Unidade Justisa ba Feto realiza aktividade treinamentu ba lider komidade feto iha Suco Betano Distrito Manufahi. Programa treinamentu ne'e ho tema "*Vítima feto husi perspetiva Lei kontra Violénsia Doméstika inklui Direitu Penál no Prosesu Penál*". Programa treinamentu ne'e nu'udar parte ida ba programa dizaminasaun informasaun ba komidade sira, maibe iha sesaun ida ne'e JSMP identifika lideransa komidade feto ne'ebé iha potencia ba Suco Betano atu partisipa iha treinamentu ne'e.

Aliende lideransa feto hirak ne'ebé sai hanesan alvu ba treinamentu nune'e mós hanesan pontu vokal ne'ebé representa ona feto maluk sira iha suco laran bainhira infrenta problema ho karakter violénsia bázeia ba jéneru sira bele ajuda prosesa kazu hirak ne'e liu husi dalan sistema justisa formal.

Diretór Ezekutivu JSMP Luis de Oliveira Sampaio hateten katak, *JSMP kontinua ho aktividade treinamentu ne'e nia objetivu atu hasae koñesimentu ba lideransa komidade feto sira konabá lei apilkavel sira, partikularmente kódigu penál, prosesu penál no lei kontra violénsia doméstika nune'e sira bele kompriende oinsa bele fasilita komidade sira prosesa kazu ruma liu husi dalan sistema justisa formal.*

Tuir JSMP nian monitorizasaun deskobre katak kazu violénsia bázeia ba jéneru nu'udar problema ne'ebé kontinua nu'udar tipu violénsia ne'ebé kontinua domina iha jurisdisaun tribunal kriminal nian ne'ebé akontese iha nasaun Timór Léste laran tomak. Refere ba razaun hirak ne'e JSMP hanoin katak atu minimiza ka halakon violénsia kontra feto presiza programa dizaminasaun informasaun husi entidade estadu no sosiedade sivil ba komidade nune'e komidade bele kumpriente katak aktu violénsia hasoru feto nu'udar krime sériu ida ne'ebé regula ona iha Lei Kontra Violénsia Doméstika.

Depois halo tiha apresentasaun materia ba partisipantes sira, fasilitator kria aktividade diskusaun nune'e partisipantes rasik identifika tipu violénsia doméstika no saida maka sai hanesan impaktu husi violénsia domestika. Ho mekanismu diskusaun ida ne'e ajuda sira bele hatene diak liu tan

saida mak konseitu violénsia doméstika tuir Lei Kontra Violénsia Doméstika ho nia sansaun hirak ne'ebé maka regula iha Kódigu Penál Timór Lésté.

Reprezentante lideransa fetu sira sujere katak, treinamentu espesifiku ba lei importante tebes iha sira nia suco tanbá durante ne'e maske sira hatene ona katak, Timór Lésté iha ona lei kontra violénsia doméstika maibe seidauk iha esplikaun ida ne'ebé klaru ba sira. Ho prezensa JSMP liu husi Unidade Juitisa ba Fetu ajuda ka kontribui ona ba asuntu legal balun liu-liu direitu fetu ne'ebé regula iha lei nomós Lei Kontra Violénsia Doméstika ho leis hirak seluk.

Observasaun JSMP, iha treinamentu ne'e partisipante sira antusiasmu teb-tebes maibe en jeral sira sei duvida atu destingui krime violénsia doméstika no krime sira seluk. Aliende ne'e maske iha ona Lei Kontra Violénsia Doméstika comunidade seidauk kumpriende didiak oinsa atu prosesu sira nia kazu liu husi sistema justisa formal. Tanbá ne'e sira rekomenda katak, sebele iha futuru JSMP nafatin halo`o treinamentu refere ba suco sira seluk iha Distritu Manufahi nia laran.

*Atu hetan informasaun kle'an, favor kontaktu:*

*Luis de Oliveira Sampaio*

*Director ezekutivu JSMP*

*Email: [luis@jsmp.minihub.org](mailto:luis@jsmp.minihub.org)*

*Landline: +670 3323883 ka +670 7295795*